

1379 bus charissimus esset, sua virtute publicam fortunam tam iniquo tempore sistere posset. Verum illum ipsum in vinculis esse, in tenebris eum jacere: qui si in luce esset, prostratos civium animos sola præsentia erigeret. Operæ precium facturos se, si una in curiam irent, peterentque a Patribus, ut continuo, ademptis vinculis, illum civitari restituerent. Vulgo exaudiri hujusmodi voces, jactari interdum hæc coram nobilibus. Quod ubi in curiam est allatum, vocato senatu, properarunt Patres suum munus occupare. Fit senatus consultum, ut Pisanus & alii ejusdem causæ rei e carcere educerentur. Quod ubi populo nunciatum est, ingens in curiam factus est concursus. Sed ut erat hominis modestia, voluit nocte illa, quæ secuta est, in carcere esse: ac interim accersito qui se audiret, confessionem fecit. Ubi vero illuxit, curiam ascendit, & ad Nicolai aram sacris interesse voluit: sumpsit & eucharistiam, ut per ea ostenderet, se omni publicæ & privatæ injuriæ ignoscere. Rumor erat, invidia paucorum fuisse eum ignominia illa affectum. His procuratis, ad conspectum Principis & Patrum abductus, non turbida, non truci, sed læta hilarique fronte Senatum omnem salutavit. Eum ad pedes constitutum Contarenus Princeps ita affatus dicitur: *Fuit tempus, Victor, quo justitiæ studuimus: nunc gratiarum tempus est. Jussimus te ob cladem ad Polam acceptam, in custodiam adduci: nunc te liberandum duximus. Tu quæso ne cognoscere velis, utrum æquius fuerit, facere; quin oblitterata præteritorum memoria, Rempublicam respice: illam jacentem erige, ac tuere: ac demum fac ita, ut tibi publicam privatamque salutem debeant tui cives, qui te ob amplissimas virtutes tuas colunt & honorant. Ad ea Pisanus, Nihil, inquit, clarissime Princeps, abs te & aliis qui Rempublicam administratis, in me proficisci potuit, quod, ut probum decet civem, non idem æquo animo fuerim laturus. Scio ego sapientissime fieri omnia, quæ e Republica fiunt: ad quod unum non vereor omnia consilia & decreta vestra spectare. Quod ad privatam injuriam attinet, tantum abest, ut hoc nomine*
sim

Victor Pisanus decreto Patrum vinculis liberatur.

Pisani modestia & injuriarum oblivio.